



Te Kura o Titahi ki te Raki

Ko Whitireia te maunga
Ko Parirua me Te Moana o Raukawa ngā awa
Ko Tainui te waka
Ko Takapūwāhia te marae
Ko Ngāti Toa Rangatira te iwi
Ko Te Kura o Titahi ki te Raki te kura
Ko Te Whānau o Te Kākanō te hapū
Tihei mauri ora!

Kei te whanga o Titahi, ki Porirua tō mātou kura e tū ana. Ahakoa he kura auraki, he whānau rumaki reo tonu tā mātou, ko te ingoa, ko Te Whānau o Te Kākanō. I whakatūhia Te Whānau o Te Kākanō hei ara mā ngā kōhungahunga e puta ana i te kōhanga reo. I mua rā kāore hoki he kura hei whakawhanake i te reo Māori.

I ngā tau e rua kua pahure ake i tīmata ai mātou ki te waihanga i te āhua o ā tātou ākongā. He nui ngā mahi i oti i a mātou ki te kohi whakaaro mai i te whānau me te hapori e pā ana ki ō rātou hiahia mō ā rātou tamariki. Ko tētahi o aua mahi, ko te tuku i te pātai nei, arā, “he aha ngā mātāpono me ngā uarā me mārāma ā tātou tamariki?” Ko ētahi o ngā whakaaro i hoki mai ko te kaitiakitanga, te manaakitanga, te whanaungatanga, me ngā mahi a te Rēhia, heoi anō ko te hiahia nui tonu ko te reo Māori me ōna tikanga.



Ka tō he rā, ka rere he rā

I roto i te wetewete kohinga kōrero i puta ko Te Whare Tapawhā hei anga pupuri, hei anga whakamārama i ēnei whakaaro katoa, arā, ko te taha wairua, ko te taha hinengaro, ko te taha tinana me te taha whānau.



I tēnei wā kei te āta wānanga mātou i ngā tapa o te whare nei kia hōhonu ake te māramatanga. Kātahi, ka tirohia ngā mahi o te akomanga me te whakahāngai i aua mahi ki ngā tapa o te whare. Hei tauira, i ia ata mahi ai ngā tamariki i te karakia, ā, ko tā te hunga kaiako mahi, he āta titiro ki tēnei mahi, me te whakaaro ake, ka noho ngā wāhanga o te karakia ki ēhea tapa o te whare?

Tērā anō tētahi mahi a ngā tamariki, arā, ko te tito pao. Mā te wetewete i te kaupapa, te whakaraupapa whakaaro me te kōtuitui kupu, e hōhonu ake ai te puna mārama a ngā tamariki ki ngā āhuatanga o te whare tapa whā nei. He paku wāhanga tēnei o tētahi pao e kōrero ana mō te taha tinana.



Ka tō he rā, ka rere he rā

*Whakaute ngā tinana katoa e,
ahakoa ko wai nō wai koe,
tiaki ngā tinana me whakaute e,
He taonga te tinana e,
Ai*

Ko te ara kōkiri whakamua i tēnei wā ko te āta wānanga he aha rawa te kiko o ia taha o te whare me tōna hāngaitanga ki ngā mahi o te akomanga, ka tahi. Ka rua, ka titiro ngā kaiako ki ngā āhutanga ako me te whakaaro ake, me pēhea ēnei e tautoko ake i tō mātou whare tapa whā. Ka toru, ka kimi whakaaro mai i te whānau me te hapori kia mōhio ai mēnā rā e hāngai tonu ana ngā mahi ki ō rātou hiahia mō ā rātou tamariki. Mā reira e torotika ai te tū o tō mātou whare.